

Sorumutu Konsellu Ministrus iha Loron 10 fulan- jullu tinan 2019

Prezidénsia Konsellu Ministrus

VIII Governu Konstitusionál

Komunikadu Imprensa

Sorumutu Konsellu Ministrus iha Loron 10 fulan- jullu tinan 2019

Konsellu Ministrus hala'ó sorumutuk iha Palásiu Governu, Dili no hahú ho apresentasaun ida husi Ministériu Edukasaun, Juventude no Desportu, kona-ba preparasaun ba Jogu Desportivu XII CPLP, Timor 2020 ne'ebé sei hala'ó husi loron 14 to'ó 24 fulan-jullu tinan 2020. Programa ne'ebé Sekretáriu Estadu Juventude no Desportu, Nélio Isaac Sarmiento, apresenta ne'e inklui país partisipante sira, modalidade no infraestruturá ne'ebé oras ne'e prepara daudaun, hanesan estádiu lubun ida ba modalidade desportiva oin-oin, alojamentu, transporte, servisu médiku sira no seguransa, no seluk tan. Iha sorumutuk ne'e iha mós apresentasaun kona-ba logotipu no múzika ne'ebé prepara espesial ba eventu internasionál ida ne'e, atu membru sira Konsellu Ministrus nian halo apresiasaun.

Konsellu Ministrus, liuhusi Rezolusaun Governu nian ida analiza no aprova ona Memorandu Entendimentu ida entre Autoridade Nasionál Petróleu no Minerais, *Department of Industry, Innovation and Science* husi *Commonwealth* Austrália nian no *Australian National Offshore Petroleum Safety and Environmental Management Authority*, kona-ba kooperasaun entre autoridade reguladora sira relasiona ho Kampu Gás Bayu-Undan nian no ninia Gazodutu. Memorandu Entendimentu apresenta husi ekipa ANPM nian, ne'ebé lidera husi Sr. Gualdino da Silva. Konsellu Ministrus fó poder tomak ba Sr. Gualdino da Silva atu asina Memorandu ne'e, hodi Autoridade Nasionál Petróleu no Minerais nia naran.

Sekretáriu Estadu Juventude no Desportu, Nélio Isaac Sarmiento, apresenta ona rezolusaun Governu nian ida ne'ebé estabese Komisaun Eventuál Interministerial ida, kona-ba Koordinasaun Atividade sira iha Ámbitu Konferénsia Ministru Juventude no Desportu CPLP nian sira no iha XII Ámbitu Jogu Desportivu sira CPLP nian. Konsellu Ministrus analiza no aprova ona Rezolusaun ne'e.

Konsellu Ministrus aprova no fó poder tomak ba Ministra Edukasaun, Juventude no Desportu, Dulce de Jesus Soares, atu asina Proposta Alterasaun Akordu Kooperasaun iha Domíniu Juventude no Desportu, ne'ebé sei hala'ó iha Luanda, Angola entre loron 22 to'ó loron 24 fulan-jullu tinan 2019.

Ministru Obras Públikas, Salvador Soares dos Reis Pires, apresenta ba Konsellu Ministrus, proposta ida atu altera kontratu kona-ba konstrusaun auto-estrada Suai, ho n. ICB/ 007/MPNR-2013, ne'ebé selebra ona ho konsórsiu China Overseas Engineering Group Co. Ltd. e China Railway First Group Co. Ltd. (seksaun I – Suai-Fatukai/Mola), ne'ebé refere ba projetu Dezenvolvimentu Infraestruturá iha Tasi Mane. Alterasaun ne'e la implika kualkér aumentu ba kustu inisial. Konsellu Ministrus aprova liuhusi Deliberasaun, proposta husi Ministru Obras Públikas nian. **Remata**

url: <http://timor-leste.gov.tl?lang=tp&p=22420>